



Harald Linkels, Presidente PCN

## **Prima di penshun PCN ta keda stabil danki na e resien desaroyo favorabel di interes**

**KRALENDIJK, 8 di òktober 2025 – Danki na e kontinuo tasa haltu di interes un oumento di prima di penshun di Pensioenfonds Caribisch Nederland (PCN) no ta nesesario. Di e manera aki e prima ta keda riba un nivel stabil di 30% di e base di**

**penshun. Esaki ta ofresé klaridat i trankilidat finansiero pa dunadónan di trabou ku ta traha nan presupuesto pa e aña benidero.**

E prima di penshun pa Pensioenfonds Caribisch Nederland (PCN) ta keda den aña 2026 pareu na esun di aña 2025. Pa motibu di e kontinuo tasa haltu di interes un oumento di e prima di penshun no ta nesesario. E prima ta keda 30% di e base di penshun. Komo ku e interes pa basta tempu ta haltu, e direktiva di PCN ta spera ku e interes aktuarial tambe, riba kua ta kalkulá e prima definitivamente, lo keda haltu na fin di e aña aki. P'esei PCN por anunsiá e altura di e prima e aña aki mas promé. Hopi dunadó di trabou a pidi esei, di manera ku nan por inkalkulá e prima di penshun na tempu den nan propio presupuesto.

Harald Linkels, presidente di direktiva di PCN: “Histórikamente mirá ta eksepsional pa PCN ku e interes ta asina haltu. Pa tal motibu tin ménos inseguridat i nos por laga dunadónan di trabou i partisipantenan sa awor kaba loke e prima di penshun ta bira den aña 2026.” E kontribushon di partisipantenan ta keda 10% i esun di dunadó di trabou 20% di e base di penshun.

Dunadónan di trabou por hasi awor un kalkulashon di e altura di e prima total di penshun pa nan presupuesto. Pa por kalkulá e primanan di penshun definitivo e altura di AOV pa aña 2026 tambe mester ta konosí. Gobièrnu ta publiká e altura di AOV. Añanan anterior a anunsiá e montantenan di AOV na kuminsamentu di luna di dezèmber. E salario máksimo ku ta duna derecho riba penshun sí ta konosí pa aña 2026. Esaki ta \$ 57.450, manera stipulá den e areglo di penshun di aña 2024, ku dunadónan di trabou i sindikatonan ku ta afiliá na Konsulta di Sektor Karibe Hulandes a kumbiní. Eiden a kumbiní ku e salario máksimo ku ta duna derecho riba penshun na aña 2026 ta \$ 57.450. Na aña 2025 esei ta ainda \$ 56.600.

Harald Linkels: “E altura di e gastunan pa konstrukshon di penshun ta dependé fuertemente di e interes aktuarial. Den añanan anterior nos a konosé periodonan ku interes aktuarial hopi abou te 1%. Aña pasá e prima di penshun tabata 35% ainda. Fin di luna di ougùstùs e interes aktuarial tabata no ménos ku 4%. Komo PCN nos no tin influensia riba esaki, pero nos ta kontenu ku p'esei nos por tene e prima relativamente abou den aña 2026.”